



## La ARLeF e fâs fieste pe Zornade Europeane des Lenghis

AI 26 DI SETEMBAR UNE INIZIATIVE TAL CÛR DI UDIN



Unîs inte diversitât nol è dome il sproc de Union europeane, ma ancje la fuarce dal nestri continent. Si stime che inte Union Europeane si fevelin passe 80 lenghis diferentis; di chestis, lis lenghis uficiâls a son 24 e chês minorizadis passe 60, feveladis di 50 milions di personis che a fasin part di une minorance nazionâl o di une comunitât di lenghe minoritarie. Une diversitât linguistiche e culturâl di prudelâ e valorizâ, tant che element di fonde de societât multiethniche contemporanie.

Il Consei de Europe al promôf il pluralisim propit parcè che lu calcole un strument che al jude la comprension interculturâl, e un element clâf dal nestri patrimoni culturâl. Al è juste apont su sô iniziative che **ai 26 di Setembar** di ogni an si festeze la **Zornade Europeane des Lenghis**. La prime Zornade Europeane des Lenghis e je stade organizade insiemi dal Consei de Europe e de Union europeane tal 2001, e è a cjapât drentri milions di personis cun ativitâts par celebrâ la diversitât linguistiche e

par promovî l'aprendiment des lenghis. Viodût il sucès vût de iniziative, il Consei al à decidût di celebrâle ogni an.

I obietîfs gjenerâi de Zornade a son di informâ il public su la impuartance di imparâ plui lenghis, cul fin di inçressi il **plurilinguism** e la **comprension culturâl**; di promovî, tutelâ e favorî la diversitât linguistiche e, par finî, di incoragjâ a imparâ lis lenghis dilunc di dute la vite, a cualsisedi etât e par cualsisedi reson. Imparâ lis lenghis di altris popolazions nus jude a capî miôr la lôr culture e a superâ lis diferencis.

Lis competencis linguistiche no son dome une necessitât comune, intun mont globalizât e intune economie cussî in moviment, ma ancje un dirit di ducj. Chest al è un dai messaçs principâi de Zornade Europeane des Lenghis. Par vê plui informazions su la Zornade, su dutis lis iniziativa organizadis in Europe e par discjamâ materiâi didactics e informatîfs, si pues lâ sul sît dal Consei de Europe a cheste direzion: [www.coe.int/edl](http://www.coe.int/edl).

Vuê, ai 26 di Setembar dal 2018, la **Agenzie Regjonâl pe Lenghe Furlane (ARLeF)**, tant che ogni an, e à volût celebrâ la zornade organizant in vie dal Lionello a Udin, un spazi informatif e promoziônâl cu la distribuzion a ducj i citadins di materiâi e di *gadgets* sul significât de Zornade e la sô impuartance, e su la lenghe furlane e lis ativitâts de ARLeF.

Cun di plui, la Agenzie e sarâ presente **sabide ai 29 e domenie ai 30 di Setembar** a **Gurize**, drenti di **Gusti di Frontiera**, in place Sant Antoni, dulâ che us spietin in tancj par vignî a cognossi lis nestrîs ativitâts e i nestrîs materiâi a pro de lenghe furlane.

